



PABLO S. QUIZA

OMENALDIA. Josu Erguini, duela 25 urte Kilometroak antolatu zutenei eta orain arte lan egin dutenei omenaldia eskaini zieten antolatzaileek.



PABLO S. QUIZA

PAISAIA. Ibilbide osoan zehar paraje zoragarriaz gozatu ahal izan zuten Beasianera gerturatu zirenek, Txindoki eta Aralarren begiradapean baitzegoen ibilaldia.

Datorren urtea arte!

PARTE-HARTZEA. Inoiz baino lagun gehiago inguratu zen Beasainera, Gipuzkoako Ikastolen zilarrezko ezteiak ospatzera

Nagore Etxeberria | BEASAIN

Eguraldi bikaina lagun, inoiz Kilometroetan bildu den jendetzarik handiena elkartu zen herenegun Beasainen, ikastolen eta euskararen aldeko jaiaren 25. urteurrenean. Antolatzaileen esanetan, 120.000tik gora lagunek parte hartu zuten Andramendi ikastolari laguntzeko antolatu zituzten ekitaldietan.

Goizeko 09:30erako ikastolako inguruan ziren politika, gizarte eta kultura munduko aurpegi ezagunak. Bertan zeuden, besteak beste, duela 25 urte Kilometroetako ideia egi bihurtzeko lanean aritu ziren 9 bikoiteak, Josu Erguin Kilometro-en sortzailea, Andramendi ikastolako ordezkariak, Ikastolen Elkarteko lehendakari Antonio Campos, Anjeles Iztueta Eusko Jaurlaritzako Hezkuntza sailburua, Luis Mari Bandres Gipuz-

koako Kultura Diputatua, Jon Jauregi Beasaingo alkatea, Xabier Aizpurua Jaurlaritzako Kultura sailburuordea, Arnaldo Otegi Batasunako eleduna, Antton Karrera IU-EBko eleduna eta Xabier Mendiguren Kontseiluko presidentea.

Txalaparta hotsaren laguntzaz hasiera eman zitzaion ekitaldiari. Une horretan solidario talde bat agertu zen presoen Euskal Herriratzearen aldeko aldarrikapena eginez.

Orain arte lanean jardun duten guztiei eskerrak eman eta dantzariak agurra eskaini ostean, Josu Erguin, bere alaba Leire eta Errose Elkoroberezibar ikastolen alde lan egin duen emakumeak moztu zuten zinta, jaiari hasiera ofiziala emanez.

Egun osoan zehar erruz ibili zen jendea, eta egunerako presatu zituzten ekitaldi guztiak oso arrakastatsuak izan zirela azpimarratu dute antolatzaileek.



PABLO S. QUIZA

Orain arteko marka guztiak hautsiz, 120.000 lagun gerturatu ziren Beasainera igandean.

ANTONIO CAMPOS

Ikastolen Elkarteko presidentea

«Ikastola eskola bera ulertzeko sistema berezi bat da»

«Ikastola ez da euskaraz irakasten duen eskola hutsa, Euskal Herri osoan hedatua dagoen eskola bera ulertzeko sistema berezi bat da. Euskal Herriak dituen hainbat helburu eta amets, ikastolen inguruan batzen dira. Ikastolen inguruan mistika berezi bat sortzen da, ikastola sinbolo bat da. Gure seme-alabak ongi heziz herri honi historian zehar irauten lagundu dion dohainak zaintzen eta transmititzen saiatuko gara».

ANJELES IZTUETA

Eusko Jaurlaritzako Hezkuntza Kontseilaria

«Euskara aurrera joango da, gure etorkizunean sinesten badugu»

«Helburua argi izan behar dugu eta lanean gogor jarraitu behar dugu. Euskara gero eta jende gehiagok ezagutzen dugu, baina erabili egin behar dugu. Euskara aurrera joango baita bultzatzen badugu eta gure etorkizunean sinesten badugu. Euskara, bestalde, gure nortasunaren gunea da eta hori argi badugu euskara eta Euskal Herria aurrera joango da. Herri mugimenduan oinarritu behar dugu geroko Euskal Herri aske hori».

ARNALDO OTEGI

Batasunako eleduna

«Ikastolak eta gure hezkuntza sistemak burujabetza behar dute»

«Pozik hartzen dugu, frankismo garaitik herri mugimendu indartsu bat dagoelako. Horrez gain, beste irakurketa bat ere badago, eta ikusten dugu, 25 urteren ostean eta ustez euskaldunok autogobernu paradisiako batean bizi garenean, ez dakit zergatik oraindik halako ekimenak egin behar diren ikastolak finantzatzeko. Erakusten du, ikastolak eta gure hezkuntza sistemak beste estatus politiko bat behar dutela, burujabetza behar dute».

JON JAUREGI

Beasaingo alkatea

«Euskarak badu babes sozial garrantzitsu bat»

«Milaka kilometro egin ondoren, euskarak eta euskal gizarteak egin du bere ibilbidea. Orain dela 25 urte Beasainen euskaldunak %40 ginen, gaur, berriz, %62 gara. Gizarteak, euskara barneratu du eta euskarak badu babes sozial garrantzitsu bat du eta hori guztia posible izan da Kilometroak jaiari esker ere. Oraindik badugu egitekorik eta eskerrak orain arte kilometroak antolatu duzen guztiei eta datozen urteetan jarrai dezagun horrela».